

Lochkoatletiski dorost wuspěšny

Wokrjesne mišterstwa w lochkoatletiskim wjaceboju za dźěći a młodostnych wotměchu so sobotu tydženja w Großröhrsdorfje. Za towarstwo OSLV Budyšin wobdźělichu so sportowcy Budyskeje Serbskeje zakładneje šule a serbskeje pěstowarnje. Woni wubědźowachu so w disciplinach 50m sprint, dalokoskok, mjetanje bulika a wutrajnostny běh. Dźěći wot starobneje klasy M10 dyrbjachu jako pjatu disciplinu hišće 60 m přez plótki/zadžewki běžec.

Za kóždu disciplinu dóstachu dorostowi lochkoatleća dypki, kotraž so na kóncu hromadže zličichu. Kóždemu ze štyrjoch serbskich wobdźělnikow je so skok na podest poradził a někotři docpěchu nowe wosobinske rekordy. Najwuspěšniši bě w sk M8 Elias Kummer (2. lětnik), kiž bu wokrjesny mišter. W sk M7 wudoby sej Juraj Nuk w swojim přenim wubědźowanju bronzowu medalju. To samne poradži so Olej Schmidtej (M9) a Janošej Nukej (M10). ■ Michał Nuk



Elias Kummer, kotryž chodži do 2. lětnika Serbskeje zakładneje šule Budyšin, je lochkoatletiske wubědźowanje starobneje klasy M 8 w Großröhrsdorfje dobył. Wokrjesnemu mištrej je tež zapósłanc Sakskeho krajneho sejma Alojs Mikławš (CDU) gratulował. Foto: Michał Nuk